

05. 04. 2005

Bosansko Grahovo

"Vedrili i oblačili", i sebi u džepove trpali?

Odmah na početku povratka u općinu Bosansko Grahovo, povratnici, a i sadašnja aktuelna vlast upozoravali su na nezakonit način dokapitalizacije većine preduzeća na teritoriji općine, a posebno preduzeća *Jadovnik* kao i nemilosrdno uništavanje šumskog bogatstva i nezakonito sticanje milionskih novčanih sredstava.

Obraćali su se bezbroj puta sa nepobitnim dokazima domaćim i stranim institucijama. To je uzaludno trajalo više od sedam godina. Ipak njihova upornost se isplatila, jer su djelatnici MUP-a Livanjskog kantona ovih dana prosljedili kaznene prijave Kantonalnom tužilaštvu Livno protiv šest lica zbog osnovane sumnje da su počinili nekoliko kaznenih djela. Prijave su podignute protiv: **Nikice Ćurka**, rođenog 1951. u Novom Travniku, **Nedeljka Jukića** (1957), rođenog u Novom Travniku, **Zlatana Čivčije** (1954), rođenog u Travniku, **Stipe Jerkovića** (1953), rođenog u Novom Travniku, **Zoran Krtalića** (1953), rođenog u Mostaru i **Drage Bilandžije** (1942), rođenog u Makarskoj.

Prva dvojica su prijavljena da su u svojstvu vlasnika preduzeća *INN Korporacija* Bosansko Grahovo nezakonito izvršili dokapitalizaciju preduzeća *Jadovnik* Bosansko Grahovo, te kroz korištenje kapaciteta i resursa tih preduzeća na nezakonit način ostvarili, odnosno sebi ili drugima pribavili višemilionsku dobit.

Treći prijavljeni Zlatan Čivčija u svojstvu povjerenika za Općinu Bosansko Grahovo, svojom radnjom kroz nesavjestan rad u službi, sačinjava akt za Viši sud u Mostaru u vidu davanja saglasnosti prenosa sredstava *Jadovnika* za novo-



Bosansko Grahovo

formirao preduzeće *Pilana* Bosansko Grahovo, koje u to vrijeme nije ni pravilno registrovano, te i drugim radnjama u radu Upravnog odbora učestvuje u iskorištavanju kapaciteta *DP Jadovnik*.

Četvrti prijavljeni u svojstvu direktora *Pilane* Bosansko Grahovo učestvuje u nezakonitim radnjama kod sačinjavanja ugovora o zajedničkom udruživanju sa prvom dvojicom.

Peti i šesti prijavljeni su u ime *Agencije za rekonstrukciju* i razvoj HR HB Mostar na nezakonit način omogućili prvom i drugom prijavljenom da mogu raspolagati i upravljati imovinom preduzeća na koje nisu imali zakonito pravo.

Svi su učinili razna kaznena djela: zloupotreba u postupku privatizacije, sklapanje štetnog ugovora, nesavjestan rad u službi. Za kaznenu prijavu protiv ove šestorke koja je nekada vedrila i oblačila u Bosanskom Grahovu i cijelom kantonu izazvala je veliko interesovanje kod građana cijelog Livanjskog kantona Zlatan Čivčija, sem što je bio povjerenik za Općinu Bosansko Grahovo bio je i vijećnik u OV Bosansko Grahovo i Kantonalnoj skupštini.

H. GROMILIĆ